

四明叢書

張宗祥

慈湖遺書

四明張氏約園開雕

序

序一卷記一卷書一卷祝文一卷行狀墓誌銘文講義
跋銘一卷賦詩一卷家記十卷紀先訓一卷附錄一卷
爲正集又雜文一卷孔子閒居解一卷並附錄爲續集
曰慈湖遺書明周廣編次者見日本內閣文庫漢書目錄先生學行
史乘記之詳矣禱昧如鋪奚敢贊一辭哉聖殂道衰學
術久裂乾坤幾乎息矣大道原於易而言人人殊莫識
根源焉先生之言曰一者易之一也一者易之一也其
純一者名之曰乾其純一者名之曰坤其一一雜者名

之曰震坎艮巽離兌其實皆易之異名初無本末精粗
大小之殊也故孔子曰吾道一以貫之子思亦曰天地
之道其爲物不貳嗚呼先生之學盡見乎是矣一貫之
言或說曰仁或說曰誠或說曰孝紛紛然也一爲道本
天地之原也惟先生獨識其然故其解經立說率以一
心貫道而嚴謹乎意念之動蓋自子貢歎性與天道不
得聞諸夫子而性道之本遂爲後世淺學者所支離性
與天道非二也易以性命連言而本諸乾中庸言天命
之謂性率性之謂道修道之謂教性天之道本一貳則

不可以爲道矣故先生與象山定師弟之分止于是非
一言再語則支離是猶性與天道之不可二也其解悟
之超識力之真豈可幾及邪夫所謂明德者亦止謂性
天之仁耳明明德乃推此性天之仁親民卽其推也孟
子言於民仁之而弗親何爲混其施也實兼親親仁民
愛物說之而已寓于止善之意故親親爲仁止于至善
爲義民有所不能親物有所不能愛故必止于至善焉
大學以明德始而累稱仁以顯之終于嚴義利之辨象
山與先生辨是非之旨亦猶是耳然則陸學之眞傳厥

惟先生得之而其確然有以自得于曾思之遺意則亦
解悟超識力真之效壽鏞讀先生書好之而弗厭謹校
而刊之特著大義于簡帙俾後學知所循守也考明史
周廣字克之崑山人案太倉舊時屬崑山弘治十八年進士授御
史疏陳四事幾爲武宗義子錢寧所害謫懷遠驛永終
南京刑部右侍郎例得附書清馮可鏞輯遺書補編一
卷慈湖世系一卷年譜二卷並刻於後民國二十三年
十月後學張壽鏞序

四庫全書總目提要

慈湖遺書十八卷續集二卷

編修汪如藻家藏本

宋楊簡撰簡有慈湖易傳已著錄金谿之學以簡爲大宗所爲文章大抵敷暢其師說其講學純入於禪先儒論之詳矣其論治務最急者五事次急者八事大抵欲罷科舉以復鄉舉里選限民田以復井田皆迂闊不達時勢然簡歷官治績乃多有可紀又非膠固鮮通者蓋簡本明練政體亦知三代之制至後世必不可行又逆知雖持是說以告世世亦必不肯用不慮其試之而不

驗故姑爲高論以自表其異於俗學霸術而已及其莅官臨事利弊可驗而知者則固隨地制宜不敢操是術以治之故又未嘗無實效也宋史本傳載簡所著有甲稿乙稿冠記昏記喪禮家記祭記釋菜禮記石魚家記及己易啓蔽諸書其目甚多陳振孫書錄解題則稱簡遺書止三卷此本自六卷以前爲雜文及詩七卷至十六卷爲家記皆雜錄論經史治道之說如語錄之體十七卷紀先訓十八卷乃錢時行狀及眞德秀跋又編雜文一卷及孔子閒居解一卷於後謂之續集與振孫所

記卷數多寡不合而集中家記內各條又有別標曰見遺書者疑先有遺書三卷初本別行後又裒輯諸編共成此集仍總以遺書名之猶之王質雪山集有三卷之本有四十卷之本歟

慈湖先生遺書序

侍御史秦君祇命按大江之西丕釐庶政罔不協於一
馴致融浹則深惜夫俗學惟馳驚口耳俾聖道不明於
人心畏難苟安耻論懼蹈支離爲功辟若汎江河望茫
淼罔知源委若啖蔗脆服綺縠罔克問粟帛雖行以習
莫著莫察乃出舊所藏慈湖先生遺書若干篇手自勘
讐得十有八卷復節縮稍食以鑊諸梓將眎夫世之學
者比訖功遺予一編讀且繹旣終卷則識夫所謂天命
之正與公人心之靈與廣理欲義利毫釐千里之異爲

學存省體充先後緩急之序古今禮樂制度之變之詳
天地日月鬼神曆數高遠運行之奧之幽人倫庶物之
巨之細之要規模條貫闊大森整而詩文若賦諸什皆
溫潤爾雅不規時好作俗下語沛乎若有契遂不辭贅
言簡端於乎士君子爲學以自命於聖賢必託諸言以
昭示無極然立言亦未易也精思力踐恍然有悟措諸
詞說氣昌而意足以不背古訓道斯至矣有宋專門文
章無慮數十家其言卒澤於道可以俟百世而不惑則
惟濂洛關閩之學爲然蓋其學以窮理尊道爲本以明

體適用爲貴式是古訓以迪知忱恂靡有他適其或未
得蚤夜孳孳不遑寧息眞若卒歲者之於衣褐若農夫
力穡以必求有秋又有若致遠負擔不弛於肩以求必
造視古聖賢同賦均予弗敢多讓體認旣眞積習漸以
久乃由中以出推於人人敦典厚俗凡上下內外罔不
章敘孚格比播諸言明粹洞徹指深慮遠與古訓若合
符節於百世之上天下後世讀其書得以引伸觸類感
發本然以不迷所適以不甘與草木鳥獸同罔罔於化
育於乎君子之學至於是其效不亦遠且大哉邇厥所

繇亦靡有他自吾心之正以求諸道優柔涵泳用俟自得焉耳慈湖先生之書其殆若是也與哉聞先生書尙多茲特其什之四五耳然非侍御君篤信而好之亦并歸於散佚也已先生姓楊名簡字敬仲浙東慈谿人宋乾道中進士終寶謨閣學士侍御名鉞字懋功正德甲戌進士蓋與先生同邑云皇明嘉靖四年歲在乙酉冬十月庚子賜進士出身嘉議大夫都察院右副都御史奉敕巡撫江西等處地方武陵陳洪謨宗禹謹序

宋史列傳

楊簡字敬仲慈溪人乾道五年舉進士授富陽主簿會
陸九淵道過富陽問答有所契遂定師弟子之禮富陽
民多服賈而不知學簡興學養士文風益振爲紹興府
司理犴獄必親臨端默以聽使自吐露越陪都臺府鼎
立簡中平無頗惟理之從一府史觸怒帥令鞠之簡白
無辜命鞠平日簡曰吏過詎能免今日實無辜必撻往
事置之法某不敢奉命帥大怒簡取告身納之爭愈力
常平使者朱熹薦之先是丞相史浩亦以簡薦差浙西

撫幹白尹張杓宜因凶歲戒不虞乃令簡督三將兵接以恩信出諸葛亮正兵法肄習之軍政大修眾大和悅改知嵯縣丁外艱服除知樂平縣興學訓士諸生聞其言有泣下者楊石二少年爲民害簡寘獄中諭以禍福咸感悟願自贖由是邑人以訟爲耻夜無盜警路不拾遺紹熙五年召爲國子博士二少年大帥縣民隨出境外呼曰楊父會斥丞相趙汝愚祭酒李祥抗章辨之簡上書言昨者危急軍民將潰亂社稷將傾危陛下所親見汝愚冒萬死易危爲安人情安定汝愚之忠陛下所

心知不必深辨臣爲祭酒屬日以義訓諸生若見利忘義畏害忘義臣耻之未幾亦遭斥主管崇道觀再任轉朝奉郎嘉泰四年賜緋衣銀魚朝散郎權發遣全州以言罷主管仙都觀嘉定元年寧宗更化授祕書郎轉朝請郎遷祕書省著作佐郎兼權兵部郎官轉對極言經國之要弭災厲消禍變之道北境傳誦爲之涕泣詔以旱蝗求直言簡上封事言旱蝗根本近在人心兼考功郎官兼禮部郎官授著作郎將作少監入對答問往復漏過八刻上目送久之兼國史院編修官兼實錄院檢